

লালমনিরহাটে গণশিক্ষা মহাসমাবেশ

দরিদ্র জনগণকে মানব সম্পদে পরিণত
করাই সরকারের লক্ষ্য : প্রধানমন্ত্রী

প্রধানমন্ত্রী খালেদা জিয়া বলেছেন, মানব উন্নয়নের জন্য সরকার শিক্ষাকে অগ্রাধিকার দেওয়ায় গত চার বছরে দেশে শিক্ষার হার প্রায় ১০ শতাংশ বেড়েছে। তিনি বলেন, সরকারের প্রধান লক্ষ্য দরিদ্র জনগণের অর্থনৈতিক অবস্থার উন্নয়ন এবং তাদেরকে মানব সম্পদে পরিণত করা। বাসস ও ইউএনবি।

লালমনিরহাট জেলা গণশিক্ষা কর্মসূচির শেষ পর্যায় উদ্বোধন উপলক্ষে স্থানীয় কাপেটরেট মাঠে লালমনিরহাট গণশিক্ষা সমিতি আয়োজিত গণশিক্ষা মহাসমাবেশে প্রধানমন্ত্রী গতকাল ভাষণ দিচ্ছিলেন। গণশিক্ষা কর্মসূচির অধীনে সম্প্রতি নিরক্ষরতার অভিযানমুখে হয়েছেন— লালমনিরহাটের এমন দুই লাখের বেশি লোক এই বিশাল সমাবেশে যোগ দেন। স্থানীয় শিক্ষক, বিভিন্ন রাজনৈতিক দলের নেতা, ইউনিয়ন পরিষদ চেয়ারম্যান এবং সমিতির সদস্য ও ছাত্ররাও সমাবেশে যোগ দেন। অন্যদের মধ্যে শিক্ষামন্ত্রী ব্যারিস্টার জমিরউদ্দিন সরকার, প্রম ও জনশক্তিমন্ত্রী মীর শওকত আলী, সাংসদ শাহিদা সরকার, গণশিক্ষা সচিব কাজী রকিবউদ্দিন আহমেদ, স্থানীয় আওয়ামী লীগ নেতা ও পৌরসভা চেয়ারম্যান মকবুল হোসেন, স্থানীয় সিপিবি নেতা হাফিজ ফেরদৌস স্বপন সমাবেশে বক্তৃতা করেন।

প্রধানমন্ত্রী খালেদা জিয়া বলেন, দেশের মোট জনসংখ্যার দুই-তৃতীয়াংশ এখনো অশিক্ষিত। তাই পুরোপুরি শিক্ষিত একটি জাতি গড়তে এখনো অনেক সময় লাগবে। প্রধানমন্ত্রী নিরক্ষরতা দূর করতে এগিয়ে আসার জন্য দলমত নির্বিশেষে সবার প্রতি, বিশেষ করে শিক্ষিত ও সম্পদশালীদের প্রতি উদাত্ত আহ্বান জানান। তিনি বলেন, স্বল্প সময়ের মধ্যে সরকারের একার পক্ষে এ কাজ করা সম্ভব নয়। শিক্ষাকে অর্থনৈতিক উন্নয়নের

দিকনির্দেশক শক্তি হিসেবে উল্লেখ করে প্রধানমন্ত্রী বলেন, নিরক্ষরতা দূরীকরণ তার সরকারের অঙ্গীকার। কারণ একটি শিক্ষিত জাতি কখনো দরিদ্র থাকতে পারে না। তিনি বলেন, বিশ্বের সকল শিক্ষিত জাতিই দারিদ্র্যমুক্ত। 'শিক্ষার জন্য খাদ্য' কর্মসূচির সাফল্যের কথা উল্লেখ করে প্রধানমন্ত্রী বলেন, এই কর্মসূচি বিভিন্ন দেশে একটি মডেলে পরিণত হয়েছে। অভিজাবকরা এখন উপার্জনের জন্য কাজে পাঠানোর বদলে তাদের সন্তানদের স্কুলে পাঠাচ্ছে। এর

ফলে বাড়তি ২১৪ লাখ ছাত্রছাত্রী এখন বিভিন্ন স্কুলে পড়াশোনা করছে। সংশ্লিষ্ট কর্মকর্তারা বলেছেন, লালমনিরহাট জেলার সকল মানুষ আগামী ৩ মাসের মধ্যে নিরক্ষরতার অভিযান থেকে মুক্ত হবে। প্রধানমন্ত্রী সমাবেশে আগত লোকজনের সঙ্গে আলাপ করেন এবং তাদের কুশল জানতে চান। প্রধানমন্ত্রী খালেদা জিয়া গণশিক্ষা কর্মসূচি বাস্তবায়নের লক্ষ্যে এগিয়ে আসার জন্য লালমনিরহাটের জনগণকে অভিনন্দন জানান।



প্রধানমন্ত্রী খালেদা জিয়া গতকাল শনিবার লালমনিরহাটের একটি নৈশ বিদ্যালয়ে একজন শিশুর লেখাপড়ার অগ্রগতি দেখছেন